

Асқад Мухтор

ИЛДИЗЛАР

(қиссалар ва ҳикоялар)

ИЛДИЗЛАР

Улар ёшлар уйи рўпарасидаги гавжум хиёбоннинг бетон йўлкасидан қўл ушлашиб келар эдилар. Баҳорнинг охирги кунларидан бири, осмон тииқ, нафас енгил, момотолининг қизғиши момиқ гуллари нафис атрини таратиб тегранади. Бу обод хиёбондан байрамдагидек ясанган ёшлар кўп ўтиб турса ҳам, мана шу жуфтга ҳамма бошқача эътибор ва ҳавас билан тикилиб қолар эди. Иккаласи ҳам баланд бўйли, қадди расо, хушбичим: қизнинг эгнида тўпиқдан келадиган узун оқ ҳарир кўйлак, кичкинагина кўк баҳмал нимча эса, ихчам сийнасини таранг тортиб турибди; йигит қимматбаҳо кулранг костюмда, сал кўтарилган пошналар бетон плитада «тўқ-тўқ» этади, қуюқ қора сочи янги модага мувофиқ елкасига тушиб, чиройли қайрилган.

Одам ёшлидаги бундай бахтли онларини ўша дамнинг ўзида унча англаб етмайди, уни кўпинча улғайгандагина қўмсаб эсламиз. Лекин булар бахтли эканликларини ҳам, бир-бирларига муносаб эканликларини ҳам, ҳамманинг ҳавасини келтираётгандикларини ҳам ҳозироқ яхши билар эдилар, чамаси. Бу уларнинг мағрур юришларидан, ошкора фаҳр ҳисси билан бир-бирларига қараб қўйишларидан, ёниб турган кўзлари-ю, чеҳраларидаги қувонч жилваларидан билиниб турар эди.

Офтобда кўп қиррали билур қадаҳдай товланиб кўринган Санъат саройи олдида сершовқин жойдан ўтар эканлар, танишлардан кимдир ишора қилиб кинога таклиф этди шекилли, йигит қизнинг юзига савол назари билан қаради. Қиз жилмайиб бош силкиганида, елкасида иккни ўрим сочи аста тўлғаниб қўйди: «йўқ».

Чиндан ҳам, улар ҳозир кинотеатрнинг қоронғи залига сифадиган эмас эдилар. Ҳаяжонли кайфиятларини атрофдагиларга ҳам юқтириб, бамайлихотир кенг проспектга чиқиб бордилар ва қўл ушлашганча машиналар орасидан югуриб, нариги тротуарга ўтдилар. Хайрлашиш пайти келди чоғи, бир-бирларига қараб тўхтаб қолдилар.

— Ажрашиб кетаверамизми, шундай куни-я, Муҳсина? Ҳеч бўлмаса, бир рюмкадан шампань...

— Вой, ана! — деди Муҳсина ҳазилакам ҳайрат билан кўзларини катта очиб.— Бунақада синовдан ўтолмай қоламиз-а.

Улар кула-кула яна қўл ушлашиб, янги кварталнинг торроқ кўчасига кириб кетдилар. Бу кўча камқатнов, иккенига ёш чинорлар экилган, нариги боши кўп қаватли оп-

пок биноларга бориб тақалар эди. Улар баланд овозда бе, малол чақчақлашиб, ўша бинолар томон юрдилар.

— Синоз муддати... алмисоқдан қолган янгилик! — деди йигит.— Синалмаган отнинг ёнидан ўтма, деган гап бор. Отни синайди, молни синайди, одамни синаш эса... айниқса севган кишиングни атай синаш... Бу — камситиш, хўрлашга ўхшаб кетади, ўлай агар!

— Кўрқаётган бўлманг яна, Марат ака? — деб чиройли кулди Мұҳсина.

— Ўзингиз ўйланг, севиш учун ошкора синаш... одамнинг иззат-нафсиға тегмайдими?

— Йўқ,— деди Мұҳсина узун, чиройли оёқларига ўзи ҳам суқ билан қараб, равон-равон одим ташларкан,— мен қаердадир ўқиганман: бир одамни чинакам севсанг, уни ҳар қадамда янгитдан кашф этаётгандай бўларкансан, янги-янги фазилатлари очилавераркан. Одам, умуман — сир. Севган кишинг эса — айниқса! Чексиз мўъжиза!

— Бу тўғри,— деди Марат,— мана, сиз менинг учун, синасам-синамасам, бари бир ажойиб мўъжизасиз! — Улар ушлашган қўлларини сиқиб қўйдилар.— Лекин бу бошқа нарса. Гап синов ҳақида. Синов... одамни худди тарозида тортиб олаётгандай... Кейин, бир ойлик синов билан иш битадими? Сиз бир умр синанг мени, Мұҳсина!

— Олдин бир ойлигидан эсон-омон ўтиб олинг!

Иккалари ҳам қаҳ-қаҳ уриб кулиб юбордилар, рўпарадаги тўққиз қаватли бинолардан акс садо келди.

— Ўтаман, шону шараф билан ўтаман, Сина...— Марат севгилисининг бундай эркаловчи номини ўзи тўқиган, ёлғиз қолганларидагина шивирлаб айтар эди.— Шу бир ой ичиди фақат яхшилик, фақат яхшилик қилганим бўлсин. Намунали йигитча бўламан, сизни иззат-ҳурмат билан қўлимда кўтариб юриб ўтказаман бир ойни!

У ҳазиллашибми, чинакамигами, қизни қўлларига кўтариб олмоқчидай интилди.

— Вой ўлай, одамлар нима дейди! — деб қиз шўхлик билан ўзини олиб қочди. Улар яна роҳат қилиб кулдилар.

— Сиз жуда хийлагарсиз! Бир ой иззат-ҳурмат... ҳа, кейин-чи?

Марат бирдан жиддий тортди:

— Ана, кўрдингизми?! Ким, қаердан олиб белгилабди синов муддатини? Балки бир ой эмас, бир йил керакдир, балки ўн йил керак бўлар? Умуман, бемаъни гап — синов!

Мұҳсина тўрсиқ лабларини чўччайтирди — қаттиқ ётироҳ билдиromoқчи эди, йигит терак соясига келиб қолганларидан фойдаланиб, уни қучиб олди.

— Синаш эмас, севиш керак!..— деди шивирлаб.

Қиз унинг бағридан юлқиниб чиқди-ю, лекин бўшашиб, паришонроқ бўлиб қолганини ўзи ҳам пайқади; тўққиз қаватли бинонинг подъездида лифт ёпилиши билан эса яна ўзини йигитнинг бағрида кўргач, унинг эҳтиросли бўсасига ёниқ лаблари билан жавоб қилди, тийиб юрган ҳисснётларига биринчи марта эрк берди.

Мана, бешинчи қават ҳам... бир бўсалик йўл экан...

Маратнинг бир хонали уйи деярли бўш: рулонлар, ўралган ватман ва тахта-тахта қофозлар билан тўла очиқ шкаф, дераза томонга қийшайтириб қўйилган чизмакашлик столию, бир янги дивандан бўлак ҳеч нарса йўқ.

— ...бирор йўғида... ўғирлик экан-да. Иккинчи бундай қилманг, Марат ака,— деди қиз ҳали ҳам юз-кўзини қаёқ-қа яширишни билмай, жиддий зарда билан. Диванга ўтиганларида Маратнинг уни энди кўраётгандай тикилишини кўриб, чўчиброқ яна такрорлади:

— Иккинчи бундай қилманг. Синовимиз энди бошланяпти.

— Шу биринчи кунни нима биландир нишонлаш керак деб ўйладим, бўлмаса эсда қолмайди, кечиринг, Мұҳсина.

Жимлик чўқди. Чиндан ҳам тарихий кун. Улар энди бир-бирларига ҳар қачонгидан ҳам кўра яқинроқ... Лекин бу жимлик...

— Чой қўяйми? — деди қиз сапчиб туриб. Бирдан ҳаммасини кечиргандай очилиб кетди.

— Кофе бор.

Мұҳсина ошхонага ўтди. Бу уй унга унча-мунча таниш. Марат билан энди танишганларида унинг илтимоси билан келиб, конкурсли бир лойиҳасини оқقا кўчириб берган эди. Ўшанда ҳам шу кухняда чой дамлаб, бирга ичган эдилар. Кейинроқ қандайдир баҳона билан яна бир кириб, иккигина минут ёлғиз қолишган эди. Мұҳсина келгандага Марат негадир доим қаттиқ ҳаяжонланади, қувонганидан шу бўм-бўш кенг уйда ҳам нимагадир қоқинади, нимадир қилмоқчи бўлади-ю, бесўнақай ҳаракат билан албатта бир нарсани афдаради ёки синдиради. Ҳозир у катта хонада дераза пардаларини очяпти. Мұҳсина уни кўрмаса ҳам, шошқалоқлигини сезиб турибди. «Шу тонда гулдонни тушириб чилпарчин қилади», дея ўйлаб, пиқ этиб ҳовучига кулиб қўйди.

Йўқ, Марат бу гал ҳеч нарсани синдирамади. Мұҳсина кофе қайнатиб чиққанида чизмакашлик столига оқ қофоз ёйилган, икки бўлак торт билан иккита фужер қўйилган, уй эгаси шампань шишасини очишга уринар эди. Мұҳсина кофе билан чашка ва ликобчаларни столга қўйибօқ, бармоқларини тишлади.

— Нима бўлди? — деди Марат ҳовдиқиб.

— Қўлимни куйдириб олдим...

Марат дарров келиб унинг бармоқларини лабига босди, пуллади, яна лабига босди.

— Мен янги лойиҳаларимда шу кухняю плиталарни йўқ даражага келтироқчиман! — деди у қизни стол ёнига ўтқазиб. Ишчанлик билан, кўпиртириб шампань қуя бошлади.

— Қандай?

— Шундай. Одам корхонада ишлайдими — бас. Уйда ҳам ишламасин-да энди. Ҳозирги одамлар ижтимоий фаол, доим банд, иш билан яшайди, уйга дам олгани, ухлагани келади, холос.

— Кухнисиз...

— Кухнисиз уйнинг ҳавоси мусаффо, уй эгаси ортиқча жиз-биз, ҳид, ис, лаш-лушу ташвишлардан холи бўлади. Шундоққина пастда ресторон, ошхона, кафе... Уларни чиройли қилиб нега қуриб қўйибди?

— Уйники бошка-да...

— Ўша ерда ҳам уйникидай қилиб тайёрлаш керак! Шу ҳам муаммоли?

— Оила, болалар... — қиз ерга қаради.

— Гап келажак лойиҳалари ҳақида. Бориб-бориб оиласларда болалар... камаяди. Статистика шуни кўрсатяпти. Замонавий тенденция шунаقا. Мен лойиҳаларимда турмушдаги асосий тенденцияларни, айниқса, техноэволюцияни кўзда тутишман, Мұҳсина. Қани, ичайлик,

Фужерларга қўйилган шампаннинг дами чиқиб кетяпти. Мұҳсина ушлаб қўяди-ю, фикри-бўлинниб яна ичмайди.

— Тенденция деганингиз ўз йўлига, баъзан камчиликлар ўсишларнинг давомидан иборат бўлади. Мен, масалан, оиласда болаларнинг кўп бўлишини истайман... — деди у. Деди-ю, қизаринқираб кўзини пастга олди. Марат унинг стол устидаги қўлини ушлаб, кулди:

— Сиз ўзингиз боласиз, кичкинам...

— Ҳазилга олманг, жиддий гапирияпман. Мен уй ишидан ҳам қўрқмайман, ҳозир аёлларнинг рўзғор тутиши осон бўлиб қолган, машина...

— Ҳа, бундан эллик йил аввал буюк Корбюзье айтган: келажакда уй тирикчилик машинасига айланади. Мана, унинг айтгани келди: ҳозир оддийгина хонадонда ҳам камида йигирма хил мотору агрегат ишлайяпти — кир юғиҷ, чанг юғиҷ, ҳаво тозалайдиган, уй совутадиган, соч қутиладиган, кофе майдалайдиган, ахлат шиббалайдиган, майса тарашлайдиган, соқол оладиган, шарбат сиқадиган, овоз кучайтирадиган машиналар, холодильник, телевизор, радиоприёмник, магнитофон, электр дазмол, электропли-

та... Кичик ЭҲМ ўрнатилган электроплита бир юз йигри-
ма хил овқат тайёрлаш программасини қабул қила олади.
Терморегуляторли това ҳозир сотиляпти...

Осон бўлиб қолган, дейсиз. Буларни сотиб олиш, жой-
лаш, бошқариш, ремонт қилиш осон эканми! Уй бекаси
эмас, доимий ўсиб, мураккаблашиб борадиган бу техноло-
гияни эгаллаган инженер бўлишингиз керак. Бу машина-
ларнинг техноэволюцияси қўл-оёғингизни чамбарчас бор-
лаб қўяди. Бунинг устига, булар бари буюм ахир. Ҳар бир
буюмга жой керак, буюмга қарашиб, уни асраш, оҳ-ҳо-о...
Одам ўзига қулайлик яратаман деб, буюмга қарам бўлиб
қолади.

— Нима қилиш керак?

— Ҳаётнинг ўзи кўрсатяпти нима қилиш кераклигини.
Уйларни иситиш марказлашди — печка-танчадан қутилдик.
Уйларни ёритиш, газ, бошқа коммуникациялар марказлаш-
ди — яна қанча ортиқча лаш-лушдан холи бўлдик. «Мой-
додир»ни болалигимизда ўқиган эдик. Эсингиздами? Қани
ўша «ичкари хонадан лапанглаб» чиқиб келадиган қўупол
«Мойдодир»? Унинг деворга кириб кетганини сиз билан
биз сезмай ҳам қолибмиз! Бундан буён ҳам шундай бўла-
ди. Мана, телевизор. Жиҳоз сифатида у бизга керакми?
Иўқ. Бизга унинг инфомрацияси керак. Қелажакда девор-
да унинг экрани қолади. Мана, холодильник. Бизга унинг
бир ярим метрлик гавдаси эмас, совуғи керак, шундайми?
Келажакда совутиш агрегати марказлашади, токчада фа-
қат бизга керак даражадаги температураси қолади. Уй-
ларни бўғиб турадиган барча жиҳоз ва ташвишлар май-
ший хизмат комбинатларига кўчади.

— Китоб...

— Катта кутубхонага китоб буюрасиз, унинг варақла-
ри истаган вақтингизда уйдаги экранингизда акс этади. Уй-
да буюм эмас, пульт тумачалир... тушуняпсизми? Энди-
ликда янги лойиҳалар мана шу йўналишларда ишланниши
керак, мен бунга аминман!

Муҳсина унинг қалин қошларини чимириб, берилиб га-
пиришига маҳлиё эди. Бир оз ўйлаб туриб, деди:

— Шундай экан. Марат ака, нима учун лойиҳаларини-
гизнинг душманлари кўп? Улардан нолиганинг нолигац,
ҳар мажлисда сизнинг жанжалингиз...

— Янгилик ҳеч қачон дарров тушунилмайди.

— Мана, мен ҳам тушунмаяпман. Сезяпманки, сиз айт-
ган уйлардан... фаришта қочади.

Марат қаҳ-қаҳ уриб кулди.

— Яна бир душман! — фужерни қўлига олиб тағин кул-
ди у.—Ҳамма душманларим сиздек бўлсин, олинг, Муҳса-

на! — у ичинб юбордй. Қиз ҳам лабига теккизиб, қўйиб қўйди. У негадир безовтә, эътирози кўпу, топиб айттолмаётганга ўжшар эди. «Фаришта»... чиндан ҳам, кулгили далил. Марат эса ўз фикрларидан раъбатланиб, гапида давом этди:

— Агар шу сафар атиги битта экспериментал микрорайоним лойиҳаси кўргазмага қабул қилинса, душманларим икки баробар камаяди! Бироқ комиссияда ҳар хил одамлар бор, Мұхсина...

— Яланғоч уйларда туришни истамаганларми?

— Яланғоч уй?

— Яланғоч ва совуқ.

— Мұхсина, илиқлиқ буюму машинада эмас, илиқлиқ қўёш нурида, жоним. Менинг уйларим тўла қўёш бўлади! Қўёш ва ҳаво! Келажак уйлари бу. Уларда одамни қарам қилиб қўядиган эмас, одамга хизмат қиласдиган ихчам ва қулай жиҳозларгина қолади. Одат бўлиб кетган нарсалардан воз кеча билиш керак. Биз ҳаммамиз негадир оёғимиздаги кишанларни яхши кўрамиз.

— Уйга фақат ухлагани келадиган одамлар бориб-бориб оиласи ҳам, хусусий ҳаётни ҳам, ҳис-туйғуларни ҳам кишангачиқаришмасмикин?..

Марат ўрнидан туриб, қизга яқинроқ келди.

— Жонгинам,— деди аста Мұхсинани доим таслим эта-диган қуюқ, ширали овози билан. Мұхсина ҳам ўрнидан турди.— Сизга аталган ҳис-туйғуларим кишан бўладиган бўлса, мен уларни бир умр судраб юришта тайёрман. Лекин... Сизга абадий муҳаббат ваъда қилган кишига бу гапнингиз... ўринли эмас. Ҳис-туйғу эса...— у қизни бағрига тортиб, соchlари билан бўйинларини қитиқлади, лаблари билан ёнокларини, лабларини қидирди. Мұхсина юзини пастга яшириб, бошини аста унинг кўксига қўйди. Шу ҳолатда анча турдилар. Қиз соchlарининг атридан меҳри товланган Марат шундай куни азиз меҳмони билан «ўринсиз мавзуда ўринсиз гап» очгағиға узр сўради.

— Гап унда эмас, сиз лойиҳангизни бари бир ҳар қаерда ҳимоя қилишингиз керак...— деди Мұхсина.— Аксинча, мен сизга қўпол гапирдим, кечирасан. Лекин ҳалигиндай лойиҳаларингиз менга тушса, олмайман, бошқа қизлар кўчирсан,— юзини кўтариб кулиб қаради у.— Мени кузатиб қўясизми?

Икки кундан кейин чертёж залининг жимжит йўлагида телефон жиринглади.

— Мұхсина! — деб қичқирди навбатчи аёл.

Чизмачи қизларнинг ҳаммаси бирдан қайрилиб қаради: эрталабдан Мұхсинани ҳеч ким телефонга чақирмас эди,

німа гап? Мұхсінаның үзи ҳам ҳайрон — Марат унга ғақат ишдан кейин телефон қылар: «Софиниши ҳам сира биласиэми?», «Кечқурун німа ишлар қиласиз?», «Қозатиб қүядиган борми?» каби ҳазіл-хузил билан ҳол-ақвөл сүраб қүяр эди. Бу әрталабки құнғироқ кимдан бўлди?

Борса — Марат экан. Овози қандайдир бошқача, нотаниш туюлди. Худди жуда узоқдан гапираётгандек.

— Німа гап? Институтдан гапиряпсизми? — Мұхсінаның күнглига негадир «лойиҳасига бир німа бўлган» деган фикр келиб кетди. Марат ишхонасига бундай барвақт келмасди.— Тинчликми?

— Тинчлик. Қишлоққа бориб келишим керак. Мирзачўлга! — деди Марат яна узоқлардан қичқиргандай.— Аям чақирибидалар, тоблари йўқ экан.— Марат фарғонача одатга кўра онасини «ая» дер эди.

— Німа бўлибди?

— Қаттиқроқ ётганмишлар, бормасам бўлмайди.

Трубкада анчагача жимлик давом этди.

— Менга қаранг, Марат, ака, мен ҳам бораман сиз билан,— деди Мұхсина,— қачон кетасиз?

— Йўғ-е, мен тезда қайтаман. Биласиз-ку, комиссия ишлайпти, мен шу ерда бўлмасам бўлмайди.

— Йўқ, мен бораман.

— Жинни бўлманг, ишдан ким жавоб беради сизга, ундан кейин...

— Сиз ўзингизда бўлинг, мен ҳозир етиб бораман, телефонда битмайдиган гапга ўхшайди.

У трубкани қўйди-ю, шошқалоқлиги билан чертёж залидаги синчков дугоналарини ҳайратда қолдириб, сумкасини қўлтиқлаганча югуриб чиқиб кетди.

Лойиҳачилик институти шундоққина муюшда эди. Мұхсина кўчага ҳам чиқмай, ҳовлини кесиб ўтиб, хизматчилар юрадиган ички подъезддан кирди-да, зинадан учинчи қаватга югуриб чиқди. Қизил пояндоз тўшалган коридорлар бўм-бўш, илмий ходимлар ишга кечроқ келишади, Маратнинг эшиги эса очиқ. Мұхсінани оёқ товушидан таниб, пешвоз чиқди. У безовта ва паришонроқ. Мұхсина уни сочи таралмаган, галстуксиз, бундай «хонаки» холатда илгари учратмаганмиди, ўзини йўқотган ёш йигитчадай кўриниб кетди кўзига.

— Німа гап? — деди Мұхсина ҳам ташвиш билан.

— Билмадим, лекин сиз «бораман»ингизни қўйинг, мен тезда қайтаман.

— Тезда қайтолмасангиз-чи?

— Мен бугун кетаман, соат иккидаги экспрессда, сиз эса ишдасиз.

— Мен ҳозир бориб, ўз ҳисобимдан жавоб оламан, бир ҳафта етадими?

— Бу ортиқча ташвиш кимга керак, Мұхсина?

— Баҳона билан мени ойнгизга күрсатасиз. Еңсам, тузалиб кетадилар.

Марат шу ножұя ҳолатда кулиб юборишига сал қолди, лекин қараса, қызы жуда ҳам жиддий гапирыпти.

— Сиз албатта ёқасиз, Мұхсина.

— Бүпти-да, ана шунда тузалиб кетадилар.

— Бироқ «күрсатгани» олиб бориш... Буюмни күрсатадилар...

— Майли, мен буюм бўлай, мол бўлай... Қани бундай ўтириинг-чи,— деди Мұхсина ўзи юмшоқ креслога чўкиб,— архитекторнинг шундай чиройли кабинетида тикка туриб гаплашмайлик. Гап ота-онага кўриниш бериш ҳақида кетяпти. Боболардан қолган удум, Марат ака.

— Ҳа, кўҳна урф. Зарур эканми? Эски вақтда зарур эди: хонадон бир, қозон-товоқ бир, тирикчилик бирга. Ҳовир энди... сиз билан мен бирга яшаймиз, шуниси мұхим.

— Бир хонадонда яшамасак ҳам, бегона бўлмаймиз, ку. Ота-она боласини умид билан, азоб билан катта қиласди. Оқибатда эса, бегонадай... Үзингизни ота ўрнига қўйиб кўринг.

— Менинг онам ёлғиз, биласиз...

— Демак, у киши сизга ҳам ота, ҳам она. Шундай бўлгандан кейин...

— Очиги, ўша сиз айтгандай, олдиндан кўриниш берганларни ҳам биламиз. Ҳамма гап ёшларнинг ўзига боғлиқ, қанча мустақил бўлсалар, иш шунча пишиқ. Ота-она га боғлиқ эканми? Олтмиш фойиз ажрашганлар қайнона-келин жанжали туфайли. Үзингиз ҳам айтган эдингиз, ҳов чизмачи дугонангиз... Умидамиди?.. Эри «ё онангни дейсан ё мени» деб кеткизворган экан-ку. Кўриниш берган билак, баъзилар бари бир бегонадан баттар бўлади.

— Менга қолса,— деди Мұхсина ўйчанлик билан стол таҳтасидан ниманидир тирноқлаб,— менга қолса, қайнона-сига рўйхуш бермаган келин ўз онасига ҳам муносиб эмас.

Марат бу босиқ гапга дарров жавоб қайтаролмай, қизнинг қўлини кафтига олиб, ўйлаб қолди.

— Ҳар ҳолда...— деди кейин,— муҳаббат, тотувлик аввало икки севишганинг ўртасида бўладиган гап. Учинчи киши ким бўлса ҳам бегона.

— Биз она ҳақида гапирыпмиз, Марат ака. Мени бормагин деяпсиз... Шуми?

— Жуда ҳам шарт бўлса...

— Мана, меникилар билан танишмиз,— дея севиниб,

юмшаб давом этди Мұхсина.— Қандай яхши. Уларнинг юзидаги ишончни, мамнунликни күрдингиз. Доим баҳт-саодат тилашади, ҳар күрганда қувониб дуо қилишади. Оқ фотиҳа бердилар. Бунда қандайдир эзгулик бор.

— Наҳотки дуога ишонсангиз? — деб кулди Марат.— Дуо-ю фотиҳа билан баҳтли бўладиган бўлса — сҳҳо!

— Тўғри, балки бунга боғлиқ эмасдир-ку, лекин ҳар ҳолда, кўнгил...

Маратни ҳамиша тўлқинлантирадиган бу овоз қандайдир сирли, уни доим мана шундай муросага келтирас эди. Йигит бир талпиниб ўрнидан турди-ю, лекин қизни қучишидан ўзини тийди — ҳар қалай, идора жой.

— Вой соддагинам-эй,— деди қизнинг тубсиз чашмадай сеҳрли кўзларига қараб,— майли, боринг, отланаколинг, кетамиз.

Қиз очилиб, чехраси чараклаб кетди.

Эшик кесакисига суюниб қолган Марат шивирлар эди:

— Шириним...

Совхоз шаҳарчасининг клуб майдонидан кириладиган халта кўчада кўк эшикни Марат узоқдан таниди. Дарвона заҳонада уларни қизил «Запорожец» билан овора бўлиб ётган кенг ёноқли хипча йигит қувончили сурон билан кутуб олди.

— Марат ака! — деб қичқирди у қўлидаги мойли латтани ташлаб қулоч ёзаркан.— Ҳой, ким бор? Марат ака! Марат акам келиб қолдилар! Ҳой... — акасининг ёнида нотаниш қизни кўриб босиққина саломлашди-да, ёш боладай қизариб, меҳмоннинг костюмига доғ юқтирамадимми дегандай бир оз эсанкираб тургач, яна «Ҳой!» деб қичқирганча ҳовли томон югурди. Марат уни:

— Латиф, Латиф, менга қара! — деб чақирса ҳам, йигитча буни эшифтади.

Ҳовли жуда кенг, саришта, боғдай серсоя, обод эди. Қўча томонда баланд пойдеворга қурилган айвонли уйдан ташқари, ўнг қўлда ҳам қатор эшиклар, ундан һари — омбор, ўчоқбоши, қазноқ, кўмирхона, оғил. Этакда эса яна безатиғлик янги уй, кичкина ойнавонли айвони билан. Ўртадаги катта сўри атрофига гулу райҳон экилган, ариқ бўйларида қовжираб тўкилган олма гули ер билан битта бўлиб ётибди. Мұхсина қошларини чимириб, тикилиб қолди: бу жойлар азал-азалдан бордай, қадимий қишлоқ ҳовлиларига ўхшайди, Мирзачўлда бундай катта, тегли хона-донлар қачон пайдо бўлиб улгурди?

Бироқ ҳовлида ғалати жимлик ҳукмрон эди. Латифнинг қувончили сурони ҳам унчалик кор қилмади шекилли, оғ

тиқча жөнланиш бўлгани йўқ. Мұҳсина ҳижолатда тугун-часиини қаёққа қўйишини билмай, нуқул ўзини Маратнинг соясига оларди. Йўл бўйи «Унинг яқинларига қандай кўринаман, нима дейман, ўзимни қандай тутишим керак?» деган ўйлар билан бўлиб, борадиган ҳовлисида оғир касал борлигини хаёлидан чиқараётган экан. Ҳозирги жимлик, ўйлаган ўйларини аллақаёққа учирив юборди.

Фиштин йўлакда Марат бирдан «Тоға!» дея олдинга интилди. Сўри томондан чаккаларига оқ тушган, чақмоқ мўйловли, кўйлак устидан энли камар тортиб, эски этик кийган, чап қўли протезли, лекин ирғайдек чайир, бақувват одам чиқиб келди. Марат билан босиққина қучоқлашиб, ёнидаги зебо қиз билан аста бош эгиб омонлашди-да, ичкарига бошлади.

— Қани, қани, зап келибсизлар-да. Савоб иш бўлибди келганингиз, Маратвой. Аячам йўқламайдилару, кўз тикканларини сезамиз. Қани, қизим, дадилроқ босаверинг.

Улар қозиқчаларга боғлаб кўтарилиган эртаки помидор жўяклари бўйлаб бориб, насосли водопровод ёнида тўхтадилар. Тоға насос дастасини босиб, шариллатиб сув тортид. Елкасига гулдор сочиқ ташлаб айвондан тушган юм-юмалоқ, семиз аёл — тоғанинг хотини — ёшларнинг кифтига қоқиб, қувониб омонлашди.

— Ёшарив кетибсиз, Файзинисо келинойи! — деди Марат, сал шўртакроқ артезиан сувини сачратиб ювинаркан. Ҳазиломуз гапни унча қувватлашмади. Файзинисо келинойи ҳам ҳол-аҳвол сўраб, шаҳарларни жиндак суриштиргандан кейин, ўзоқ томонга ўтиб кетди.

Йўл чангини ювиб, артинишгач, тоға катта уйнинг айвони томонга йўл кўрсатди:

— Аввал аянгизнинг дуоларини олайлик.

Катта-катта деразалари айвон томонга қараган ёруғ хона жуда саришта (Файзинисо келинойи шу уйдан кечикиб чиқди), ёнидаги каравотда ётган бемор ҳам хабардор қилинган экан чофи, боши оқ ёстиқлар билан кўтарилиган, интизор кўзлари ёшланган эди. Девордаги қизил чаман гул палак олдида оппоқ чойшаблар, онанинг оқ оралаган сочлари, кўпдан бўён кун юзини кўрмаган рангпар чеҳраси айниқса, янги келганларга оғир таъсир қилди. Марат беморнинг бошига бориб тиз чўқди, онанинг заиф қўлларини олиб юзига босди. Унинг ёнида тоға турарди, Файзинисо келинойи билан Мұҳсина — пойгакроқда. Улар она-боланинг кўришишига ҳурмат билдириб, курсиларга ҳам ўтирамай, узоқ жим қолдилар. Фарзанд нафасига қонган она бир манзилга етгандай қўз юмиб ором олди, кейин ўғлининг дийдорига яна бир тикилиб, қайта кўзини юмди.

— Баракалла, болам, келибсан, тан-жонинг омонми? Уртөқларинг, ишинг... Шаҳар қураман деган эдинг; қурднингми?..

Марат маъюс кулимсиради-да, шаҳардаги ишларидан тирикчилигидан қисқа гапириб, сўради:

— Аяжон, қаерингиз оғрияпти, юрагингизми?

— Кексалик, болам. Юрак оғримаса, бошқаси оғририди. Биз қарияларнинг иши шунақа, ҳечқиси йўқ... Ўзингдан гапир.

Мұҳсина Марат учун ҳижолат тортиб, қўрқиб турган эди. «Касал бўлмасам, келиб хабар ҳам олмайсан» дея дашном беришини, учрашув, терговлар, изоҳлар, важлар билан дилхираликка айланишини кутган эди. Йўқ, она ҳеч қандай таъналар қилмади. Қайтага, уни деб одамлар келиб турганига, ҳатто узоқлардан ҳам кимдир йўқлаб келганига хижолат тортгандай, уйда тикка турганларга ожиз бир назар билан қаради.

— Айтгандай... ая,— Марат Мұҳсинанинг ёнига бориб, уни олдинроққа етаклади,— мана, Мұҳсина... бизнинг институтнинг чизмакашлик корхонасида ишлайди. Биз... ЗАГСга ариза берганмиз.

Тоға билан Файзинисо келинойи бунинг шундай эканлигини ҳалиеқ тахминлашган эди. Она эса бу хабардан ҳаяжонланиб, бир оз қўрқитди: дард тутган пайтларида гидек кўзини юмаркан, қовоқлари ўта сарғайиб кўринди. Бирпастдан кейингина дармонсиз қўлларини қиз томон ёйиб, бутун ҳаётини кутгандай интизор талпинди. Марат Мұҳсинани туртди. Мұҳсина ҳам юбкасининг еллигичдай этакларини ёйиб каравот олдидা тиз чўқди-да, онага кифтини тутди, бўртиб турган иссиқ лабларини юзига текизди. Онанинг унга тикилган кўзлари ёшга тўлди. Унинг юзкўзи ҳам, товуши ҳам Маратниги шу қадар ўхшар эдичи, Мұҳсинага худди эски қадрдондай туюлди.

— Бир-бирларингга ёққан бўлсанглар, мингдан-минг розиман, болам, қўша қаринглар... Бу кунларга етказганига шукур.

Бўлғуси келин тоға билан Файзинисо келинойига ҳам ёқди: қадди зебогина эмас, одобли, оқила ҳам экан. Унинг меҳр тафти билан беморга ҳам жиндек ранг юргургандай бўлди, она ҳақиқатан ҳам баҳтиёр эди, чамаси, фақат қувончини изҳор этишга қурби етмаяпти. Ширин туйғулари билан иссиққина бўлиб, анчагача жим ётди. Шундан кейингина, соғ вақтларида гидек, анча тетик товуш билан:

— Файзинисо, меҳмонларга ош осдингизми, ўзингиз қа-ранг уларга, яхши дам олишсин...— дея, ҳаммага жавоб

берди. Охирроқда ҳолган тоға унинг кўрпасини тузатаркан, пастроқ овозда:

— Ана энди опоқ бўлиб кетасиз, аяча, келин муборак, во! — дея, соғ қўлининг бош бармоғини кўрсатиб, опасига солдатча шўхлик қилиб чиқиб кетди.

Она чиндан ҳам кейинги вақтларда ҳеч қачон ўзини бундай енгил сезгани йўқ эди. Толиқдими, негадир ёлиз қолгиси келди. Ширин хаёлларнинг опоқ парқу ёстиқларида сузиб кетаётгандай, роҳатдан бўшашиб, уйқуга кетди.

Ташқаридаги қоронғи тушган, дам еган ош ҳиди анқир эди. Учоқбошидан Латифнинг товуши келди:

— Чорпояга жой қилақолинг, дада.

Тоға сўри тепасидаги чироқни ёққанида маълум бўлдики, Файзинисо келиноЯи аллақачон сўрига янги кўрпа-чалар ташлаб, дастурхонни эртаки гилосу қулупнайлар билан чўғдай безатиб қўйган экан, беташвиш пайтлар бўлганда, роса очилиб чақчақлашадиган оқшом эди-ю, ҳозир... Афсус, ўшандай пайтларнинг қадрига етмаймиз. Марат болалигини, дадаси барҳаёт йилларини эслади. Армиядан янги қайтган тоғаси шўх, ҳали хипчагина келинчак Файзинисонинг қўлида Латиф, рўзгорни измига олган «аяча» ошни ҳамиша ҳафсала билан ўзи дамлар, эркаклар ночоргина ҳовлидаги мана шу сўрида «қиттак-қиттак» қилишиб, ярим кечгача иноқ гурунглар бўлғувчи эди. Энди у пайтлар қайтиб келмайди. Хонадоннинг оғирини енгил қилиб турган аяжони бу аҳволда... Ҳовлиниңг файзи қочгандай нимадир етишмай турибди...

Латифнинг катта лаганда кўтариб келган зарчавали оши сўрида буғланиб анча турди, эркаклар руҳсизгина бир-бирларини қистаб, чиқиб ўтиришгандан кейин ҳам Латифнинг овозидан бўлак сас чиқмади. Латиф «меҳмон опасини дастурхонга қистар эди. Файзинисо келиноЙи ичкаридан чиқмагани учун, Мұҳсина даврага қовушолмайроқ турди. Кейин эса:

— Мен... ичкарига кирай,— деб илтимос қилди. Гапсўзи оғирлиги ёқиб қолган бемор она кўз ўнгидан кетмас эди.

— Ҳозир ухляяптилар, нима қиласиз...— деб Марат эътиroz билдирган эди, тоға қиз боланинг кўнглини тушуниди:

— Ўйқулари қуш уйқу. Қиринг, майли, келиноЙингиз ўша ерда, кирақолинг сиз ҳам, қизим.

Уларга ошни ичкарига беришди.

Сўрида эса гурунг юришмай, ош ҳам совиб, ахир гап барни бир ўша кутилган кўнгилсиз мавзуга бориб тақалди.

— Докторлар нима деяпти? — сўради Марат.

Тоға негадир индамади. Латиф шунча қувониб дамлаган оши увол бўлаётганига алам қилиб, иштаҳасиз бўлса ҳам ўртадаги тогора билан овора эди: дам гўштни майдалайди, дам устихонни ликопчага олиб, меҳмон томон суради.

— Касалхонага ётсалар, балки тезроқ тузалар эдилар,— деди яна Марат. Унга овқат татимади. Онасини бу қадар ночор алфозда деб ўйламаган эди, гарангсиброқ қолди.

— Ётдилар... узоқ ётдилар касалхонада,— деди тоға.— Касалхонамиз яхши, янги, ёруғ. Аммо зерикдилар, уйга олиб кетинг деб туриб олдилар.

— Докторлар...

— Докторлар ҳам кўнишиди.

— Нимага?

— Уйда даволанишларига.

— Вақти-вақти билан яна ётқизилса... врачлар назоратида, ҳар тугур...

— Кўп уёқ-буёққа уринтириб юришнинг ҳосияти йўқ экан, юрак...

Марат назарида тоға нимадир яширяпти, ниманидир билади-ю, очиқ айтгиси йўқ, индамайди, айлантиради.

— Улар нима дейишяпти ахир? — яна сўради Марат.

Тоға, бу саволга нуқул чап бераётгани ўзига ҳам аён бўлиб қолгач:

— Улар... улар ҳеч нима дейишмаяпти,— деди. Оҳангига қараб бу жавобнинг маъноси чуқурроқ эканини пайқаш мумкин эди.— Эркакча гап мана шу, ўғлим. Ноумид шайтон, умид билан яшаб турибмиз. Қани, ошга қаранг.

Улар онда-сонда ошга қўл узатиб, сўнинкина суҳбатлашишар экан, кўнгилсиз мавзудан четга чиқишга уринишар, лекин шаҳар тирикчилиги, у-бу ҳақда яккам-дуккам гапдан кейин турунг яна тўхтаб қолар, ўрганилмаган жойнинг тунги жимлиги Маратга аллақандай ёт туюлар, тепадаги катта лампанинг зириллаши юрагини сиқар эди. Шунча йиллардан бери энди учрашиб турган қон-қардошларнинг айтгани гап тополмай бир-бирларига тикилиб ўтириши ўзларига ҳам ноқулай, турган-битгани азоб эди. Латиф тоқатсизланиб, туриб чой дамлаб келди. Чойдан кейин сўридагилар шу ернинг ўзига жой қилиб, ётиб қолишиди, ичкаридагилар — ичкарида. Кечаси билан гап бўлгани йўқ, эҳтимол — уйқу ҳам.

Эрталаб Марат юз-қўлинин чайибоқ, онасининг олдига шошли.

Аёллар ухлашмаганми, нима бало, худди кечагидай гу-

РУНГЛАШИБ ЎТИРИШАР, БЕМОРНИНГ ЧЕХРАСИ ТИНИК, ЛАНГ ОЧИК
ДЕРАЗАДАН АЙВОН ЎСТУНИГА ОСИЛГАН ТЎРҚОВОҲДАГИ БЕДАНА-
НИНГ ЧАҚ-ЧАҚИ ЯНГРАБ ЭШИТИЛАР ЭДИ.

— Кел, айланай болам, яхши дам олиб олдингми? — деди онаси тетик овоз билан.

— Қуллуқ. Ўзингиз тузукмисиз, ая? — Марат каравот ёнидаги курсига ўтирди. Файзинисо келинойи «вой ўлай, кун кўтарилиб қолибди, тоғангизни ишга кузатиб қўяй» деб, ишчан қиёфада чиқиб кетди.

— Хўп яхши гаплашиб ўтирик, болам, меҳмон қизимга уйқу бермадиму, жуда ёзилдим аммо,— деди она андижон шевасида,— сенинг ҳам қулоғинг зап қизигандир.

Марат билан Мұҳсинанинг кўзлари тўқнашди: йигитнинг қарашидаги илиқ миннатдорликни пайқаган қиз кўзларини аста қўйига олди.

— Сени шу кеча жуда соғиндим, болам. Илгарилари ундан эмасдим... Оқшом кўрдиму, келбатинг кечаси билан кўз ўнгимда турди... Мана, Мұҳсина қизим ишларингни қувониб гапириб берди, энди унинг кўзи билан кўр-япман сени...

— Кўп гапиряпсиз, аяжон, чарчаб қолманг тағин,— деди Мұҳсина ораларига райҳон қистирилган ёстиқларни тузатиб.

— «Аяжон» деган тилларингга жоним тасаддуқ...— деди она унинг қўлини ушлаб.— Қизим менга жуда маъқул бўлди, айланай болам, худоё бахтиларингни тугал берсин.

— Ая, чиндан ҳам сиз бугун кўпроқ гапиряпсиз, дорингизни ичдингизми? — деди Марат гапга чап бермоқчи бўлиб.

— Сизларнинг баҳт-толеңгизни кўриш бизга энг яхши дори, болам. Мана, келдинглар, туппа-тузук бўлиб қолдим. Энди анави Латифнинг ҳам иши бир ёқлик бўлса эди... Файзинисо ҳам ичига ютиб юрибди-ю, куйиб адо бўлди шўрлик.

— Латиф? Латифга нима бўлган?

— Сизларга айтишмабди-да, бундан чиқди...— деди бемор кўзини четга олиб. Бир оз нафас роствлади.— Нима бўлганини ўзим ҳам билмайман. Қичкина тўй қилиб, уйлаб қўйган эдик.

— Латифни-я? Қачон? — ҳайрон бўлди Марат.

— Тўрт ой бўлди. Ўзи хоҳлаб олган эди...

— Кеткизиворди. Эртасига ёқ.

— Хўш?

— Нимага ахир? Емон қиз эканми?

— Лоладеккина қиз эди, ана у пастдаги янги совхоздан,

— О, Латиф тушмагур-э, индамайди-я! Тўйга айтмагани майли, кечадан бери индамагани-чи,вой, писмиқ! — деб сонига урди Марат.

— Бизларга ҳам гапирмайди. Ҳайдади-қўйди, вассалом! Бу қанақаси, болам? Ўзинг бир акалик қилиб, қўйнига қўл солиб кўр, балки сенинг маслаҳатингга кўнар, йўл топарсизлар, бош кўтаролмай қолдик-ку!

— Бизнинг жиян шунаقا сирли шахс дeng ҳали? — Марат кулди.— О, писмиғ-е! Албатта гаплашиш керак у билан. Ҳамманинг кўзига кул пуркаб юраверадими. Сиз бу аҳволда бўлсангиз. Айтгандай, отаси-чи, тоғам?

— Отаси — солдат. Гапирганга шартта жавобини бериб кетаверади. Қелин туширган биз хотин-халажга қийин. Гаплаш, болам, уканг бўлади, йўлга сол...

— Ҳаммаси ўрнига тушади, хотиржам бўлинг,— деди Марат қўлларини бир-бирига ишқалаб ўрнидан тураркан.

У онанинг топширигини бажариб, унинг кўнглини тинчтиши учун астойдил бел боғлади. Лекин Латиф ҳали далада эди. Марат ҳовлида айланиб юрди, бетоқат бўлди, зерикди. Муҳсина беморни уҳлатиб чиққанида безовта ўйларини унга гапирди:

— Кўрдингизми! Булар ҳам бир ойлик синовлардан ўтишган, албатта. Лекин оқибат... — қўлларини ёйди у.— Севдим дедингми, бир-бирингни ҳурмат қил. У ҳам шахс, бу ҳам шахс. Ҳайдавориши нимаси?

— Сабабини билиш керак, Марат ака, унгача бир нима дейиш...

— Сабаби! Сабаби — қишлоқилик-да!

Бу вақт Латифнинг ўзи келиб қолди. У «Запорожец»ни дарвозахонага киргизиб, устини ёпди-да, илжайиб келди. Акасини кўриши билан бир нимани сезди шекилли, юзида кулгиси қотиб бирпас тургач, ошхона томон ўтмоқчи бўлди.

— Қани, буёқса юринг-чи, тракторчи! — деди Марат ҳовли этагидаги янги уй томонни кўрсатиб.

— Овқатимни еб олай.

— Овқатни кейин қиласиз.

Латиф ноилождан эргашди. Улар келин-куёвнинг ясатиғлик уйига бирин-кетин кириб кетдилар.

Муҳсина хавотир олиб, берироқдаги ўрик соясида ўша эшикка тикилганча туриб қолди. Марат Латифдан олти ёшча катта, тергаса ҳаққи бор, албатта. Лекин важоҳати бир хил бўлиб кириб кетди, бу нозик ишда қош қўйман деб, кўз чиқариб қўймаса бўлгани.

Ака-уканинг «музокара»си анча узоққа чўзилди. Лекин

иҷкаридан ади-бади, у-бу товуш эшилмади ҳайрият. Ётиғи билан гаплашиб, муросага келишсин, ишқилиб.

Муҳсина шундай деб турганида эшик бирдан тарақлаб очилиб, Марат чиқиб келди. У қизариб кетган, соchlарини панжаси билан асабий тароқлар, ўзининг одатдаги зиёли қиёфасига ярашмаган товушда қичқирап эди:

— Тракторчи эмиш тағин! Механизатор! Аравакаш экансан, механизатор эмас!

— Ака, ахир... — деб гап қотмоқчи бўларди унинг кетидан ранги оқариб чиқиб келган Латиф. Лекин Марат унга сўз бермади:

— Тағин ўзини оқлади бу! Йигирмага кириб-кирмай ота-боболарнинг алмисоқдан қолган бидъатини қаёқдан юқтира қолдинг? А? Менга қара...

— Ота-боболарнинг айби йўқ... Нима қилса, яхши бўлсин деб қилган.

— Менга қара, қайси замонда яшаб турибсан ўзи, шуни биласанми?

— Замон яхши, қизлар унга муносиб бўлишлари кепрак,— Латиф журъатсизроқ бўлса ҳам босиқ овозда жавобини қайтариб турарди.

— Бундай ашаддий қолоқ тушунчали сендек нодонга хотин ҳайф! Бир каминг — қиз чиқмади, деб шўринг қурғуни кўча-кўйда сазойи қилиш қолибди.

— Ака, ахир, мана ўзингизни қўйиб кўринг менинг ўрнимга... — Латиф шундай деди-ю, сал нарида турган Муҳсинанинг кўзига кўзи тушиб, бирдан чўчигандай тўхтаб қолди. Бир дам ғалати қараб туриб, беҳосдан юзини ёлқин ямлагандай, кўзини енги билан тўсиб, йиғлаганча шартта орқасига қайрилиб, уйга кириб кетди.

Марат Муҳсинанинг ҳаяжондан нурланиб, яна ҳам чиройли бўлиб кетган кўзларига қаради-ю, бош эгди.

— Нима қилиб қўйдингиз Марат ака... — деб унга яқинлашди Муҳсина,— кўрмаяпсизми, изтироби ўз бошида ошиб ётибди. Ич этини еб, билдирмай юрган, яхши кўради қайлигини... Сиз бўлсангиз, ўлганнинг устига тепган қилиб...

Муҳсина Латиф кириб кетган эшикни тақиллатди, аста очиб, ичкарига қадам қўйди.

Бу маҳал тоға ишдан қайтиб, узоқдан Маратга кўз солди-ю, дарвозахонада дук-дук этиб этикларининг чангини қоқди. Кейин водопроводда соғ қўли билан юзини чайиб:

— Нима гап? — деб сўради. У нима гап эканлигини, бўлиб ўтган шовқинни пайқаган эди.

— Ҳеч гап йўқ. Латиф билан жиндек гурунглашиб ол-дик... — деди Марат.

— Хўш?

— Ҳайронман, сиз ота бўлиб, нега индамай юрибсиз. Шундай ашаддий бидъатга йўл қўйиб...

Тоға қора чарм қўлқоп кийган протезли қўли билан сочиқни олма шохига иларкан, Маратга чимирилиб қараб қўйди.

— Аянгиз тузукмилар?

— У кишининг ётиб қолишига ҳам сабаб бўлганга ўхшайди бу боланинг нодонлиги.

Тоға секин бориб сўрига чиқди, сочиқ бостириб қўйилган чойнакни ёнига олиб, чой қайтарди. Марат ҳам келиб кўрпачанинг четига омонат ўтирди.

— Бундан чиқди, бизнинг астарпахтамизни роса ағдарибсиз-да, «қишлоқилар», у-бу, деб... — салмоқланиб гапирди тоға, — Латифни уришмадим эмас, уришдим ҳам, ўгитладим ҳам. Лекин... менга қолса, бола ҳар ҳолда тўғри қилган.

— Ана холос! Сиздек жаҳонгашта солдат, Европагача кўриб келган одам-а?

— Биз Европага ҳар хил модаларни кўргани бормаганимиз, жиян. Мана чой ичинг,— тоға унга пиёла узатди.

— Қанақа мода?

— Мода эмишку ҳозир... ўрта мактабдаёқ... — тоға сўз тополмай қийналиб қолди.— Унинчи синфгача ифратни сақлаб юриш қолоқлик, маданиятсизлик ҳисобланармиш.

— Извогарларнинг гапи... Сизга ярашмайди.

— Бўлса бордир. Лекин сиз ҳимоя қилаётган замонавий келиним тўққизинчини энди битирган эди.

— Ана, кўрдингизми, ёш! Алданган бўлиши мумкин.

— Латиф уни алдангани учун эмас, алдагани учун жазолаяпти.

— ... Бу қадар шафқатсизликни унга сиз ҳам эп кўриб-сиз-да?

— Шафқатсизлик... Ота-боболаримиз бунинг учун қизларни тош-бўрон қилишган. Мен буни маъқулламайман, албатта, лекин номусни шу қадар баланд қўйишларини маъқуллайман. Ор-номусни ёшлиқдан ардоқлаган ота-боболаримиз. Эплаганча ардоқлаган. Сиз Европани гапирдингиз. Тўғри, кўрдик. Европа ҳам ҳар хил экан. «Озод севги» деган чиркинларни ҳам эшитганимиз. Лекин ҳар бир юртнинг ўз ахлоқий ақидалари бор, жиян. Биз ота-боболарнинг яхши удумларини ҳурмат қиласиз. Бунинг устига, муҳаббатни улуғлайдиган катта-кичик, эски-янги китоблар

бор, ўқигансыз. Биз унча күп ўқиёлмадигу, лекин турмушда, урушда бунинг нима әканини билдик. Эзгу, ўтли түйғу. Қызлик иффати ана шу эзгуликнинг бир бўлаги эмасми? Виждон, имон ҳаётда ёш қизлар учун шундан бошланмайдими?

— ... Энди... шундай бўлиб қолган бўлса-чи, нима қилиш керак? Бир умрга шарманда қилиш шартми?

— Бу гапингиз қалтис, жиян. Уни ҳар томонга бураса бўллади. Мана, биз яшириб кетсак, бошқа бирор кешириб кетса, сизга ўхшаган яна бирор «нима бўпти?» деса... Бундан бу ахлоқий иллатнинг ёппасига авж олишини қўллаб-қувватлашга биргина қадам қолади-ку?!

— Энди унинг ота-онасининг аҳволини ҳам кўз олдингизга келтиринг, тоға. Қудаларингиз, бу қишлоқ жойда...

— Шаҳарми, қишлоқми — ахлоқ бир. Ота-она эса, шунчаки сўз эмас. Унинг масъулияти бор. Яъни жавобини ҳам беришга тўғри келади. Севги шундай кучли эҳтирос экан, унинг қасоси ҳам ўзига яраша-да. Биз нима қилайлик?

— Латиф... яхши кўрар экан шекилли, орада сиз айтган ўша эзгу ўт — муҳаббат ҳам қурбон бўлиб кетяпти.

— Яхши кўрса, бориб олиб келади. Беш болали хотинга ишқи тушганлар ҳам бор. Севса, олаверсин. Мен сиз ўйлагандай тақвадорлардан эмасман. Гап турмушимиzinиң энг чиройли руҳий бойлиги ҳақида — ёшлик иффати,номус, ибо ҳақида кетяпти. Иффат — севгининг онаси. Ахлоқий, нопоклик жазосиз қолмаслиги керак, мен шуни биламан.

— Мен ҳам шуни биламанки, шахсий туйғулар — даҳлизиз, тоға. Ҳозир баъзан буни «интим» дейдилар. Ҳар нарсанни оммалаштириб, маҳрам ҳисларга қўпол аралашиш шахсга ҳурматсизлик бўлади. Ўтмишга эмас, келажакка қараш керак. Айниқса хотин-қиз масаласида. Жазо, қасос деган гапларингиздан сарқитнинг ҳиди келади.

— Ҳай... тушунтиrolмадим,— деди тоға бўшаган чойнак-пиёлани нари суриб. У ишдан келганида анча тетик эди, энди юзлари салқи, чарчаган кўринди. Ажинларига оқшом сояси тушди.— Аммо менга ҳам сингмади гапларингиз, жиян. Ёшимиз ўтиб қолганга ўхшайди. Фақат ўша «интим»ларингиз ачиб кетмаса деб қўрқаман.

Бу пайт этакдаги янги уйдан Мұхсина чиқиб келди. Үбояги ҳаяжон, безовта ҳолатдан қутилган, юз ифодалари сокин, майнин, ўзини босиб олган эди.

— Саломалайкум, тоға, яхши келдингизми?

— Қуллуқ, қизим, қани, чой ичинг.

Қиз раҳмат айтиб, айвон томон юрмоқчи эди, Марат уни тўхтатди.

— Гаплашдингизми?

— Ҳа....— деди Мұхсина ўйланиб туриб.— У жуда ба-
мъни йигит экан.— Қомати расо қыз шу май оқшомидай
сөхрли, сұлым қарашлари билан тоғани ҳам суқлантириди.—
Сұхбати ширин. Ўн түртта мамлакат филателистлари
билан хатлашиб туаркан. Коллекциясини күрсатди.

— Марка томоша қылдым денг ҳали? — кесатди Марат.

— Ҳа,— деб Мұхсина соддалик билан давом этди: — у
сиз айтгандай... нодон йигит эмас Марат ака. Биласизми,
жақон океанларида сизнинг исмингиз билан боғлиқ икки-
та кема сузиб юрибди экан... Маркаларда ўша кемаларни
күрдим. Қани, топинг-чи, у қанақа кемалар?

Йигит истеңзолироқ жилмайиб, деди:

— Инқиlobчи Жань Поль Марат номидаги кема...

— Иккінчиси-чи?

— Иккінчиси...

— Билмайсизми? Ана, Марат бўлсангиз ҳам билмай-
сиз. Жан Поль Маратнинг қотили номига қўйилган кема
ҳам, афсуски, бор экан,— деди Мұхсина йигитни «мот»
қилганига болаларча қувониб. Унинг дуркун қаддига ер
остидан ҳавас билан қараб, «Наҳотки бу қыз ҳам ёшлар
ахлоқи ҳақида Марат билан ҳамфикр бўлса?» деб галати-
роқ разм солиб турган тоға ҳам энди сал очилиб, жилма-
йиб қўиди.

— Ҳа энди, қотилни ҳам билиш шарт эмас,— деди Ма-
рат. Сўридан тушиб, қизни айвон томон бошлади.— Ҳўш,
уни қўйинг-буни қўйинг, Латиф масаласида аямга нима
деймиз?

Улар ёнма-ён юриб, бемор ётган уйга кириб кетишди.
«Ҳаммаси жойида бўлади, арзимаган гап экан» деб юпа-
тишиди. Лекин онанинг кўнгли ҳамма нарсани сезиб, билиб
турар, тасаллилар шунчаки кўнгил учун эканини тушуниб
ёпар эди. Қирди-чиқди, яқин-йироқдан кўнгил сўраб кел-
ганилар, хастадан хабар оловчилар кўп, ҳаммаси тасалли
учун бир гап айтади, лекин беморнинг аҳволи ўша-ўша.
Одам киргандагина заъфарон қовоқларини аста очади, ик-
ки гапдан толиқиб қолади, кузги япроқдай узилишга шай
булиб ётибди. Лекин у ҳамиша озода, соchlари таралган,
рўмоли бегижим, юзи мармардай соф, чойшабу болиш
жилллари сутдай оппоқ, рўмолчасигача дазмоллаб, ёнига
қўйилган. Файзинисо келинойи унинг табиатини билади:
она ҳамиша шундай озода эди, ҳозир ҳам, гўё бир маърака
тарафдудини кўраётгандай, ўзи ҳам, ётган жойи ҳам са-
ришта бўлишини истайди.

Бемор билан кундузлари кўпинча Мұхсина қолар эди.

Унинг назаридаги, она бирорларни кўп ташвишга солаётганидан ҳижил, «тезроқ омонатини олақолса», деяётгандай беҳаловат. Одамлар узоқлардан келиб кетишяпти. Мана, бугун бешинчи кун, Марат ҳам ҳовлида бетоқат уёқдан-буёққа юриб турибди. Одам узоқ кўришмаса бегоналашади шекилли, кирса гаплашгани гап тополмайди. Шунинг учун онаси ёнида узоқ ўтиромайди ҳам: ҳадеб касаллик ҳақида гапириш, ҳадеб тасалли қидириш... Яна нима? Яна нима... Чиқиб ҳовлида юради.

Муҳсина уни баъзида беихтиёр кузатиб туради. Ана, юриб, чарчади. Сўрига бориб ўтирди. Чекмас эди, ҳар замонда Латифнинг сигаретидан олиб тутатяпти ҳам. Зерикяпти. Соатига қаради...

Муҳсина ғалати бўлиб кетди: нега соатига қарайди? Нимани кутяпти?

Унинг бетоқатлигини тушунса бўлади, албатта: биринки кунга деб келган эди. Энди онани бу аҳволда ташлаб кетиб бўлмаса... Шаҳарда муҳим ишлари қолиб кетди. Лойиҳасини конкурсга топширган, комиссия нима қарорга келди? Тақдирни ҳал бўладиган кунларда у ипсиз боғланиб буёқда юрибди. Бир ўйлаганда, унинг аҳволини тушунса бўлади.

Лекин... унинг соатга бетоқатлик билан бир қараб қўйиши ҳозир Муҳсинанинг кўнглига бир муз парчасини ташлагандек бўлди. Наҳотки...

Марат яна турди, қўлинин орқасига қўйиб, гуллар орасидаги йўлкада тағин уёқ-буёққа юра бошлади.

— Зерикяпсизми, Маратжон? — деб сўради ошхона томонга лапанглаб ўтаётган Файзинисо келинайи.

— А? Иўғ-е... — деди Марат, бир тўхтади-ю, қаердалигини аниқламоқчи бўлгандай атрофга аланглаб, яна юра бошлади. Муҳсина зўр бериб хаёлидан қуваётган фикр яна муздек бўлиб дилига қоқилди: кутяпти, тезроқ бир ёқли бўлишини...

Муҳсина пешанасини совуқ деворга тираб, юрагининг хунук «гуп-гупи»га қулоқ солиб турди. Беихтиёр югуриб бемор ёнига кирди. Она оқ чойшаб, оқ ёстиқларга кўмилгандай, кўзини юмганча, юпқагина бўлиб ётар, унинг зайн юраги ором олар эди. Муҳсина эса хонадондаги жимлини бутун вужуди билан сезиб, яна ўз юрагининг «гуп-гупи»ни эшилди-ю, бир нимадан қўрқандай югуриб чақиб, Маратнинг ёнига борди. Марат қайрилиб унга қаради. Киз ўзича унинг бир хабар кутаётганини кўзидан тахминлади-ми, яна даҳшатга келди.

— Нима гап, Муҳсина?

Унинг овози илгариgidек таниш, қадрдан эди. Алла-қандай совуқликни кутган Мұхсина ўзига келди, күнгли дар галгидай меҳр ҳисси билан илиди.

Марат ҳақида ёмон ўйлаганига ўзи ҳам хижолат. Онасининг тузалиб кетишини кутади-да. Кутмай қаёққа боради? Қолаверса, шундай бекорчиликда вақт ўтказишнинг ўзи ҳам бир нимани кутишга ўхшайди. Маратга ҳам осон эмас. Бу азобларнинг охири борми, деб ҳар ким ҳам ўйлади ахир. Лекин... шундай бўлса ҳам, «бир нимани кутиш...» Ҳозирги вазиятда мана шунинг ўзи... Нима қилиш керак бўлмаса?

— Ҳеч гап йўқ, ухляяптилар...— деди Мұхсина. Лекин ўзининг товушида қандайдир бегона бир оҳангни бари бир пайқади-ю, яна таъкидлаб қўйди:— Яхши, чамамда, анча яхшилар.

Бу ясамароқ чиқди. Умуман қиз сөздики, уларнинг муомалаларида биринчи марта аллақандай сунъийлик қалқиб қўйди: ўйлаганларини бир-бирларига тўла айтмаяптилар. Маратнинг бугун айниқса руҳи сўнник. Нега? Онанинг бу аҳволигами, ёки ўз режаларининг бузилганигами? Мұхсина Марат ҳақида бу хилдаги қутсиз саволни ҳеч қаҷон кўнглига келтирган эмас эди.

Эртасига улар беморнинг олдида узоқ ўтиридилар. Уларга қараб, онанинг нурсиз кўзлари бир оз жонланар, боласининг баҳтини кўриб тўймас эди.

— Шу ярашган қадди қоматларингни даданг раҳматлик кўролмадилар...— деди товуши товланиб.—...Бугун гира-шира саҳар палласи тушимгами, ўнгимгами келиб, кўриниш бердилар, чорляяптилар, чамамда...

— Ая!...— деди Марат бир қалқиниб, норози оҳангда.— Қўйинг қаёқдаги гапларни...

— Хўп, болам. Лекигин, бари бир ўлимни алдаб бўлмас экан,— деди она чўзинчоқ юзини Мұхсина томон бўриб. Очиқлик билан, соддагина гап бошлади.— Бу ерларга янги кўчиб келган пайтларимиз қазо қилганлар. Баданларида иккита темир парчаси билан қайтган эдилар урушдан. Қамишзорни қуритамиз деб, кузни куни созликда сув кечиб...— ўша кунларнинг оғир хотираси бутун вужудини совутиб, она анчагача гапини давом эттиrolмади.— ...Уч кун ётдилар холос. Атрофда уч-тўрт капаю ертўла қамишу шўр шамолдан бўлак нарса йўқ... Бу ерларга ҳали меҳнатимиз сингмаган, теримиз томмаган. Қабристон тугул, биронта дўмпайган тўр ҳам йўқ. Бегона жойда қолдиргимиз келмади... Туғилган қишлоғимизга олиб кетдик. Ўша ерда ётибдилар...

— Ая... бошқа гаплардан гаплашайлик,— деди яна Марат, у бошқа мавзуга ўтишни чин кўнгилдан хоҳлар, лекин ўзи туэукроқ мавзу ҳам, гап ҳам тополмас эди.— Мана, тузылиб кетганингиздан кейин, биз...

— Мұхсина қизимнинг кўнглини оғримтма, болам, ҳеч қачон, нима бўлсанглар ҳам. Мана, мен нима учун дадангни эслаяпман? У киши кўнглимга чироғ ёқиб кетганлар. Бошлаган ишлари чала қолмади, бу жойларни обод қилдик. У кишига шуни айтиб, димоғларини чоғ қилишим жерак. Мени дадангнинг ёнларига...

— Ая...— деб Марат ўрнидан туриб кетди.

Бемор ҳақиқатан ҳам «икки дунё» оралиғидаги ўз оламидан чиқолмай қолган, унинг гаплари ростга ҳам, иситма пайтидаги бежо гапларга ҳам ўхшар эди. Мұхсина ҳам ўрнидан туриб, унинг ёстиқларини тузатиб, кўрпа қатидан тушиб ётган сўлғин, лекин хушбўй раён шохчаларини жой-жойига қистирган бўлди.

— Аяжон, бунаقا гапни қўйинг дедим-ку,— Марат яна ўтириб, ёлворган товуш билан онасини ёш боладай юпата бошлади,— тезроқ тузалинг, сизни шаҳарга олиб кетамиз, тўйимизнинг тўрида ўтирасиз...

Мұхсина сесканиб кетди. Бундай пайтда тасалли берилади, тасаллилар кўпинча ёлғонга ҳам ўхшайди-ю, лекин бу гал онанинг васиятнамо сўзини бўлиб айтилган бу гап жуда ҳам ясама, совуқ туюлди унга. Ўз тўйи ҳақидаги гап бундай ёқимсиз эшитилишини ким хаёлига келтиради дейсиз.

Лекин бу оғир ҳолатни ҳам яна онанинг ўзи юмшатди.

— Тўй дегандан, қизим, шу сандиқни очинг-а,— она тахмон ёнидаги эски сандиқни кўрсатди.— Энг тагида, бурчакда бир қутича бор...

Мұхсина сандиқ устидаги самовар билан патнисни четга олиб, қопқофини очди.

— Энг тагида, болам.

Мұхсина ялпиз, атир совун ҳиди келиб турган қат-қат оқ сурп, сочиқ, қора баҳмал, яна аллақандай газмол, бурungi камзул, таңгали қалпоқлар тагидан кичкина сирланган тунука қутини топиб, сандиқни ёпди-да, икки қўллаб онанинг ёнидаги курсига қўйди. Она ётган жойида заиф қўллари билан қутини очиб, рўмолчага тугилган қадимий тақинчоқни олди, уни икки қўллаб тутиб, узоқ томоша қилди. Қумуш зебигардон нафис ишланган, лекин оғир, зангламайдиган ўйма гуллари қорайиб кўринар эди.

— Қайнонам раҳматлик, жойлари жаннатда бўлсин, никоҳ куним кўксимга осиб қўйган эдилар. Қелин бўлиб

түшгандаридаги қайналари совра қилған экан. Жуда күх-на мол. Бир умр асададим, ҳеч қаерда бөшқа мунақасини күрмадим.

— Чиройли! — деди Мұхсина ҳам беихтиёр. — Қелин-чаклик пайтингизда сизга жуда ярашган бўлса керак!

— Жуда. Ҳамманинг ҳаваси келар эди.

— Бахтли экансиз,— деди Мұхсина.

— Бахтли эдим.

Улар зебигардоннинг қорайиб йилтиллаган қадимий кумуш нақшларини қайта-қайта томоша қилдилар. Мавзунинг ўзгарганидан мамиун бўлиб турган Марат ҳам уларга қўшилиб, нозик ҳуқра заңжирларини ушлаб-ушлаб кўрди.

— Қани, берироқ келчи, қизим...— она узэк ёшлигининг қадрон ёдгорлигини икки қўллаб ёйиб кўтарди,— эгил,— деди. Мұхсина энгашганида, зебигардонни бўйнидан ошириб кўксига тақиб қўйди. Қадимий оғир тақинчоқ Мұхсинанинг баланд кўксига, ихчам, тарағ сийнасига худди ёпишиб тушди, зебо қоматига шундай ярашдики, она киприкларидаги қувонч ёшларили артмай, кўзини юмганча узоқ ётди. Тиниқ ёш кўз атрофларидаги тарам-тарам ажинлари оралаб ёйилди. Онанинг кўз ўнгига ҳозир ҳаётининг қайси бахтиёр онлари келди экан!

Ёшлар ҳам бир-бирларига қараб туришар, юзларида шу зумнинг аралаш-қуралаш туйғулари жилваланар, вазиятни унутаёзган эдилар.

— Сенга мендан ёдгорлик бўлсин, қизим,— деди она ҳамон кўзини очмай,— оиласизнинг қутлуг мероси.

— Вой ўлай, менгами?! — деб шивирлади Мұхсина ишонмай, икки қўлини кумуш беҳак устидан кўксенга босди.

— Бахтли бўл, болам, умрингдан барака топ.

Мұхсина негадир дилдан қувона олмади. Раҳмат айтиб, онани қучиб, юзларидан ўпди-ю, худди видолашаётгандаги совуқликни сезиб, қўрқиб кетди. Марат ҳам негадир бетоқат, бу ердан тезроқ чиқиб кетгиси келаётгандай, Мұхсинага қарап эди. Қиз тақинчоқни қутичага жойлади-ю, қаёққа қўйишини билмай, кўксига босганча турарди. Марат уни етаклади.

— Толиқтириб қўйдик, дам олсинлар,— деди паст овозда.

Она кўзини юмиб ётганча қолди. У уйғоқмиди, уйқудами, билиш қийин...

Кечқурун одатдагиңа сүрида чой ичдилар, айвон устунига осиғлиқ түркөвоқда бедана охирги марта сүстгина сайради-да, тинди. Сүридагилар ҳар хил гаплардан узоқ гаплашиб ўтириб, зебигардонни ҳам қўлма-қўл узатиб томоша қилдилар. Охири эснашиб, эркагу аёллар жой-жойларига тарқалишди, бугун ҳеч қанақа воқеа, бахс, кескин гап бўлгани йўқ, тинч оқшом тубсиз қоронри тунга уланниб кетди.

Фақат тоға ётмади. У зебигардонни этагида ёйиб ушлаганча сүрида ёлғиз узоқ ўтириб қолди. Ҳамма уйқуга кетганидан кейин оёқ учиди юриб, аячасининг эшигига борди. Бирлас қулоқ солиб туриб, яна орқасига қайтди, Файзинисони уйғотмоқчи бўлди шекилли-ю, тағин тўхтаб, айвон устуни ёнида ўтириб қолди. Ҳорғин қиёфасида кекса солдатга хос бўлмаган саросима бирпасдан кейин бесабр изтиробга, сўнгра аллақандай сўлғинликка айланди. Узоқ кўнгилсиз хотиралар босиб келгандай, салқи юзида қуюқ соялар ўйнади. Эшик тепасидаги фонарнинг кичкина лампаси зириллаб ёнар, зина тагида чирилдоқ чириллар эди. Тоға туннинг жимлигига чидолмагандай ўрнидан турди-да, яна аячасининг эшигига борди. Очиб, остонаядан ичкарига ҳатлади, орқасидан ой шуъласидай енгил оқ эшик секин фирчиллаб ёпилди...

Саҳарда ҳамма бирваракай уйғонгандек, бирпасда ҳовли қўйи-қўшнига тўлиб кетди. Одам кўпу, ичкаридаги хотин-халажнинг йиғи-сифисидан бўлак овоз йўқ, ҳеч ким «жони узилди», «қазо қилди» ёки «ўлди» деган гапни оғзига олмади. Тоға, Латиф бошлиқ қўшни йигит-яланг ҳамда қариялар бел боғлаб тараффудга тушган, ҳар ким маросимнинг савоб юмушларига қўл ургиси келар, фақат Марат гангиб, нима қилишини билмай, бир чеккада туриб қолган эди. У чиндан ҳам ўзини йўқотиб қўйди. Марҳумнинг энг яқин кишиси, бирдан-бир жигари ҳамма ташвиши ўз қўлига ололмаганига одамлар ажаблангани йўқ, она акир, онаизордан жудо бўлиш ҳар қандай йигитни ҳам эсанкиратади.

Марат кечагина ўзи узоқ гаплашиб ўтирган хонага кўпчилик қатори шундоқ бош суқиб, онасининг оқ ёстиққа чўйкан кичик гавдасига, сап-сариқ юзига бир қаради-ю, кўзини олди, орқага чекинди. Шу-шу, қайтиб кира олмади. Муҳсина хотин-халаж орасидан чиқиб, унинг елкасига тўн ёпди, кўпроқ унинг яқинида бўлишга ҳаракат қилди. Чунки қараса, ҳамма нима биландир банд, у эса ёлғиз, нимага қўл уришини билмайди. Агар онасининг олдига кирадиган бўлса, Муҳсина у билан бирга бўлиб, далда бериб турмоқчи эди, лекин Марат кирмади, киролмади. Одам-

лар марҳума билан видолашаётганда бир-икки марта эшик томон қадам ташлади-ю, ичкарига кирмай яна қайтди. У худди сөвқотгандай, юзи кўкариброқ турар, Муҳсинага гоҳо бу ердан қаёққадир отилиб чиқиб кетгиси келаётгандай туюлар эди.

Тушга яқин тоға келиб унинг белини қийиқ билан тан-ғиб қўйди, кейин дарвоза томон бошлаб чиқиб, «шу ерда бир оз туриб, келган-кетганни кутинг, таъзиясини қабул қилинг», деди. Марат тоғасининг айтганини қилди, шу ерда бир-икки соат турди.

Ташвишлар ва одамлар сал товшалгандан кейин ҳовли ичкарисидаги гулзор ёқасига қўйилган кичик чорпояда бир-иккита қариялар марҳуманинг эзгу одатларидан, дунёнинг ишларидан гаплашиб ўтиришди. Бири маҳалланинг энг кекса ветерани, бири пенсиядаги муаллим, кейинроқ тоға ҳам келиб қўшилди. Қимdir «ҳозирги ёшлар»дан гап очганда Муҳсина суҳбатга беихтиёр қулоқ тутиб қолди.

— Ўлим кутилган бўлса ҳам, ҳамиша кутилмагандай... — деди оқсоқол, — унинг қархисида ҳамма ҳам ўзини ту-табилавермайди...

— Булар нима, булар бамисоли вокзалга чиққан кузатувчилар-да... Кузатгани келган. Раҳми келади, йиғлайди, ҳар ким эплаганича.

— Нима қилса, нима деса ҳам, ўлим қархисида беўхшов кўринавераркан. Улар учун ҳозир энг муҳими — мусибатдан тезроқ ҳоли бўлиш, бари тезроқ ўтиб кетақолса... Бунинг хунук ҳиссиёт эканини ўзи ҳам билади. Нима қилсин, инсон шу экан-да, тирик тирикчилигини ўйлайди.

— Ўлимга атайлаб шайланмайди-да одам. Худди боқий қоладигандек юраверасан...

— Мен сизга айтсан, домла,— деб аралашиб тоға,— бу — ҳозиргиларда бир касал... Биладики, у дунёда ҳеч вақо йўқ, буни ўйлашнинг ўзи даҳшат, албатта. Қўрқади. Ўлимни кўришдан ҳам, ўйлашдан ҳам қочади.

Шунинг учун ўлимнинг ларзаси ҳам суст, аҳамияти ҳам...

— Аҳамияти?

— ...аҳамияти десам ҳам хато бўлмайди. Мана, урушда одам ўқдан, ярадан ўларди. Бордию, шунчаки ўлса... Бир воқеа ҳали-ҳали ёдимда. Хитово деган қишлоқни эгалладигу, эрталаб командиримиз билан ҳовлиларни айланиб юрсак, бир қоронғи даҳлизда кексароқ киши ўлиб ётибди. «Ким ўлдири?» деб сўрадик қўшниларидан. «Ўзи ўлиб қолди», дейишди. Ҳаммамиз ҳанг-манг бўлиб, тикилиб қолибмиз. «Қаранг-а!» деди командиримиз анчадан

кейин, гүё ўз ажали билан ўлган одамга ҳавас қилгандай.

— У даврларда шунаقا эди. Ҳозир...

Ҳозир одам ўқдан эмас, ярадан эмас, ўша урушнинг бутун оқибатларидан, ҳаётдан, унинг шафқатсизликларидан ўлади. Бу — урушда ҳалок бўлишдан кам эмас-ку. Нега унинг ларзаси сусаяди, нега ундан юз ўгириб, тезроқ четлашишга ҳаракат қиласми?..

Дарвозахонада жонланиш сезилди. Ҳовлида дасталари сийқаланиб кетган эски тобут пайдо бўлди. Юраги дукуллаб, негадир ваҳимага тушган Муҳсина одамлар орасидан ўтмаслик учун, қозиқчаларга боғлаб кўтарилган помидор кўчватларини оралаб, Маратни қидириб кетди.

Марат ҳамон дарвоза ёнида кирган-чиққангага қўл қовштириб турарди. Муҳсина уни имлаб четроққа чақирди.

— Нега айтмадингиз, эсингиздан чиқдими? — деди нимранг юзига тикилиб. Марат тушунмади.— Аянгизнинг айтганлари-чи... Дадангизнинг ёnlарига қўйиши...

Марат бармоқлари билан пешанасини сиқди:

— Ҳа энди, айтдилар қўйдилар-да... Мураккаблаштирамаг.

— Ахир, она васияти...

Марат ёнверига қараб, қизни яна четроққа ундинди. У жунжуккандай, ранги кўкишроқ, кўзлари қизарган, бугун соқолини ҳам қирмаган, тароқсиз сочи чопон ёқасига тушиб турар эди.

— Қанақа васият? Қанақа васият?! Ўзингиз ўйлаб кўрсангиз-чи, ҳозир Мирзачўлга энди ката тикилган пайтлар эмас ахир. Одамлар кулмайдими?

— Айтганларини қилсангиз, руҳлари безовта бўлмасди дейман-да...— қиз унга раҳми келиб, товушини пасайди, бош эгди.

— Одам ўлди-кетди. Ё чиндан ҳам руҳга ишонасизми?

— Ўзингизнинг кўнглингиз тинч бўларди...

— Қанақасига тинч бўлади: ўликни шундан шуёққа олиб бориш яна уч кунлик ташвиш-ку, биласизми шуни? Ҳали шундоқ ҳам...

Муҳсина ўзи ҳам совқотгандай дийдираб кетди. У бундай маросимда биринчи марта бевосита қатнашяпти. Кўзига ёш келди. «Улик...» Қечагина «ая» эди. «Ая» — қандай яхши, илиқ сўз. Марҳуманинг «қизим менга жуда ёқиб қолди» деб сўлғин жилмайиши кўз ўнгига келди. Ӯлим бу қадар шафқатсиз! Наҳотки одамлар унинг қаҳрини жиндак бўлса ҳам юмшатолмайдилар?

Мана, қабристонга бориш олдидан кўпгина ёшлар ас-

та-секин ҳар томонга тарқаб көтишди. Марҳумани сўнгги йўлга асосан қарияларгина кузатиб бордилар, баъзилари одобга кўра кўзларини артиб қўярдилар, ёшлар эса шуни ҳам ўзларига эп кўришмади. Орада энг ёши Марат, лекин у бу нарсалар ҳақида ўйлаяптимикин ҳозир?

Ҳамманинг хаёли бир жойдан чиқиши қийин, ҳатто иккни киши ҳам бир хил ўйлаши шарт эмас, албатта. Айниқса, бундай мусибатли дамларда фикрларнинг учини тутиш, бир нуқтага жамлаш осон эмас, хаёллар аллақаёқларга улоқиб кетади. Қовоқлари қизарган Марат хассакашлар орасида бош эгиб тураркан, негадир қабристоннинг совхоз шаҳарчасига жуда яқин эканлиги ҳақида ўйларди. Қейин ҳаёли ўз лойиҳаларига кетиб қолди: янги шаҳар лойиҳаларида қабристонни қаёққа мўлжаллаш маъқул? Узоқроққа, шаҳардан йироққа, албатта. Токи одамлар фақат ҳаётни ўйласинлар. Маратнинг рақиби, шубҳасиз, бунга қарши чиқади: ўлим ҳам тириқларга хизмат қилиши керак, дейди у, қабр шаҳар ичидагулларга кўмилиб ётиши, умр қисқа — дам ғанимат эканлигини эслатиб турishi керак, деб даъво қилади...

Ҳаёлдаги бу баҳс Маратга атрофдаги мудҳиш жимликтан, бундай вақтда юракка чиркин ҳашаротдек ўрмалаб кирадиган тупроқ шитиридан, гоҳи нарироқда бирдан кўтарилган аччиқ йиғи товушидан холироқ бўлишга ёрдам берарди. У кўзини ерга тикиб турди, ҳеч нарса қилолмади, боя тобутни кўтаришда энди қаторга кирганида Латиф келиб жойини эгаллаган эди, ҳозир белкурак ушлаганида яна Латиф чаққонлик билан келиб қўлидан олди. Латиф ҳар жойда ҳозир, тажрибали қарияларнинг қўлтиғига кириб, ҳамма қора ишни ўзи қилди.

Марат она қабрига бир сиқим тупроқ ташлагач, қўлини барига артиб четга чиққанча қабр томонга бошқа қайрилиб қарай олмади. Негадир, Муҳсинанинг дарвоза олдидағи гапи, кейинги кўз қараши ёдига келди. «Кўнглингиз тинч бўларди...» Қандай тинч бўлади? Ўлимга бирон нима билан бошқа маъно бериб бўлар эканми? Ўлим — ўлим-да. Уни руҳу удум, эски урғу ривоятларга чулғамасдан, одатдаги бор нарса деб қарайвериш керак.

Аза кунлари улар бирга бўлолмадилар. Бу ноқулай ҳам бўлар эди. Лекин гап бундагина эмас. Муҳсина бу кунлари Маратга кўринингиси келмади, у ўзининг ҳолатини биларди. Хотин-ҳалаж орасида ивирсир, қўлидан келганча дастёрлик қилган бўлар, лекин бир нимасини йўқотгандек паришибонҳол эди. Бир-иккита коса, пиёла қўлидан тушиб синди ҳам. «Худди ўз онасидан жудо бўлгандай, шўрлик кўнгилчан қиз экан», дейишар эди хотинлар.

Онанинг «уч»ини ўтказгандан кейин йўлга отланишиди.
Марат фақат шу кунни кутгандай, эрталабдан ошиқиб
нарсаларини йиғиштира бошлади. Сумкалари битта, Мара-
рат кўтариб келган, Марат кўтариб кетади. Мұҳсина ёд-
торлик совғани — қадимий кумуш зебигардан солинган ту-
пика қутини кўксига босиб олиб келди. Марат қўлига олиб,
бир қизга қаради-да, сумкага жойлади.

— Мұҳсина... — деди аста, ерга қараб. У кечадан бери
қизнинг сўлғинроқ юришини кузатиб, унинг олдида ўзини
нима учундир айбдордай, нима учундир узр сўраши керак-
дай сезар эди. — Сизни олиб келмасам бўлар экан... Ури-
ниб қолдингиз. Бундай бўлишини билганимда...

— Ундай деманг... Шундай кунда мусибатингизга ше-
рик бўлганим — сизга ҳам, менга ҳам керак эди, Марат
ака.

Шу билан улар автобусда ҳам йўл бўйи бир-бирларига
деярли гап қотмадилар. Совхоздагилар билан қандай хайр-
лашганлари ҳам ёдларида қолмади.

Фақат, бир соатча юргандан кейин, Мұҳсина бехосдан
сўради:

— Дадангиzinинг қабрларида бўлганимисиз?

Марат унга бир қараб қўйди-ю, кейин деразадан қўзи-
ни олмай, қозиқقا ўрнатилган бетон ариқлар соясида қов-
жираб улгурмаган лолақизғалдоқларни томоша қилган-
дай, анчагача жим ўтириди. Қизнинг сумка устидаги қўли-
га кафтини қўйиб:

— Эски гапларни қанча тезроқ унутсанг, келгусидаги-
ларни ўйлаш учун шунча кўпроқ имкон туғилади... — деди
жавобни мужмалроқ қилиб.

— Дадангиз ярадан ўлганлар. У киши шу билан бал-
ки мени ҳам қутқазгандирлар. Мени яхши кўрасиз-ку...

— Чукӯр кетдингиз. Бундай ўйлайвериш... Бундай
яшаш... Узи шундоқ ҳам ҳаёт осон эмас.

Йўлдаги гап бор-йўғи шу бўлди. Нима ҳам дейишсин,
мусибат ёш, нафис туйғуларни ҳам карахт қилиб қўяр
екан. Гапнинг қовушмаганлигини иккаласи ҳам мана шун-
га йўйишиди.

Шаҳарга куннинг тифида етиб келдилар. Тиқилинч кў-
чаларнинг иссиқ, ғуборли ҳавоси, чорраҳалардаги сурон,
мотор, ҳуштак овозлари, тошқин шаҳар ҳаёти Маратни сал
илгариги ҳолатга қайтаргандай бўлди-ю, Мұҳсина
ҳамон ўзига келолмас, ҳорғин кўринар, камгап эди.
Кўришганда ҳам, хайрлашганда ҳам одамлар қўзини шам-
ралат қилиб тезгина ўпишиб оладиган ёшлар бу гал за-

виятга мувофиқ босиқ ажралишди: «Дамингизни олинг», «Хабарлашармиз», «Телефон қилинг...»

Икки кундан кейин Мұхсина у-бу нарсаларни баҳона қилиб Маратнинг уйига келди, у ҳали ҳам ўша-ўша, сира дам олмагандай, ориқлаб, кўзлари янада каттароқ бўлиб қолган эди. Маратнинг бўсасига ҳам илгаригидай эҳтирос билан жавоб бермади.

— Сина... нима бўлди? — деб сўради Марат.

— Ҳеч нима... — дея ҳазинроқ жилмайди қиз.

— Яхшилаб дам олишингиз керак эди,— деди Марат, кўнгли бир оз жойига тушиб.— Нима ўқияпсиз? — у Мұхсинанинг қўлтиқлаб келган китобини олиб кўрди: Чингиз Айтматов, «Асрларга татигулик кун»,— Яхши китобми?

Мұхсина ҳали ўқимаган эди, елкасини қисди.

— Ўқиганингида менга ҳам ҳикоя қилиб берарсиз. Ҳозир вақт шундай зиққи, гирдобга тушиб қолгандайман. Кўргазма комиссияси ишини якунлаяпти, ҳамма шу атрофда гирдикапалак, сизга айтиб қўяқолай: яхши прогнозлар бор!

Мұхсина сафар сумкасидаги ўз нарсаларини ажратаркан, бирдан тўхтаб, ниманидир қидириб қолди. Унинг бу ҳолати Маратнинг қувноқ товушини бўлди.

— Нима?

— Аянгизнинг совғалари...

— Зебигардонми?! — деб қўл силтаб кулди Марат.— Институтда оғзимдан гуллаб қўйган эканман, драм тўгракдаги ҳаваскорлар қўярда қўймай келиб олиб кетишиди. Тарихий-майший мавзулардаги спектакллар учун бебаҳо реквизит эмиш!

— ... Марат ака, ахир...— Мұхсина унга ғалати тикилиб қолди, уни энди кўраётгандай, юз-кўзида ҳайрат.

— Нима қилай ахир, ҳаваскорлар деган билан, бири кандидат, бири доктарант, келиб туриб олиши...— У Мұхсинанинг оқаринқираган юзига қараб гапдан тўхтади. Ёнига борди. Қучди.— Мұхсина, наҳотки шунга хафа бўлсангиз, сиз уни тақиб юрармидингиз ахир, бурунги замоннинг кампирлари дай...— у хохолаб кулиб ҳам кўрди, кулгиси сунъий чиқди, Мұхсина ҳам ўша-ўша — хастадай рангпар, эшик томон қадам қўйяпти,— Мұхсина! Сизга тақинчоқ керак бўлса, мен тилласидан олиб берай, ажойибидан...

Нарсаларини пала-партиш қўлтиқлаган Мұхсина осто-нада паришонҳол «хўп, хайр» деди-да, чиқди. Марат орқасидан шошиб чиққанида лифт эшиги ёпилган эди. Иккинчи лифтнинг тугмасини босди, аксига олиб у ҳам кела-

вермади. Зинапоядан югуриб, бешинчи қаватдан пастга тушди-ю, тротуар тўла одамлар оқимида қаёққа юришни билмай туртиниб, бирпас гангид тургач, орқасига қайтди.

Ажаб, Мұхсинаға нима бўлди? У билан гаплашиш тобора қийинлашиб кетяпти. Ҳаётни мумкин қадар соддлаштиришга, оёққа илашган ўтмишдан, урфу удумлардан, шартли боғланишлардан холи бўлиб, енгил тортиб, фақат келажакка интилиб яшашга аҳд қилган Марат гүё қумлоқ йўлга тушиб қолгандай, қадами унмаяпти. Мұҳаббатга мана шундай изтироблар муқаррар йўлдошмикин? Наҳотки бу ҳам бир юк бўлса? Соф ўзи йўқми?

Бундай ўйлар Маратни бир-икки кун қийнади-ю, кейин институтда, кўргазма комиссияси атрофидаги машмашалар, талашув-тортишув — тарафкашлик, кўмма оқимлар билан бўлиб, барини унугиб юборди. Бир неча республикада шаҳарлараро кўчиб юриши мўлжалланган бу кўргазманинг ҳар бир автор учун аҳамияти жуда катта эди. Унга лойиҳалар танлашда комиссия биринчи галда ижодий ўзига хосликни, оригиналликни мезон қилиб олди. Охири маълум бўлди, танлаб олинган ўн тўқиз лойиҳа ичидаги Маратнинг «микрорайон»и ҳам бор экан.

Буни эшигандан кейин Маратнинг кўнглидан ҳамма хиравликлар тумандай кўтарилиб, энг ширин орзулари, Мұхсина ва соф мұҳаббатнинг ўзи қолди, холос. Ҳамкасларининг қутловларига жавоб ҳам бермай кабинетига, телефонга югарди.

— Сина! Салом! Табриклишингиз мумкин! А? Ҳаммаси ўзим айтгандай бўлди! Ҳаммаси жойида!.. Раҳмат... нега овозингиз бундай? Нега сустсиз деяпман? Менга қаранг, хиёбонга чиқинг, мен зумда етиб бораман, ҳа, ҳозир!

У стол тортмаларини наридан-бери бекитиб, енгил плашини олди-ю, югарди.

Ҳаво булат, дим эди. Ёғадиганга ўхшайди. Майли, ёғса ҳавонинг губорини олади, дарахтлар ҳам барглари йилтиллаб, яшнаб кетади, Мұхсина яхши кўрадиган терак ҳиди анқийди. Марат ҳозир ёмғирдан кейинги мусаффо, хушбўй хиёбонни кўз ўнгига кўргандай бўлди.

Бироқ ёз бошидаёқ анча тўзон йигиб улгурган теракзор хиёбонда ҳаво димиққан, йўлкаларни соя-салқин ўрнига булатли кун ғира-шираси босиб турар эди. Улар одатда учрашадиган сал майишиқ кўк скамейка бўш, ишхонаси шундоққина рўпарада бўлса ҳам, Мұхсинадан ҳали дарак йўқ эди. Марат узоққа кетмай, шу атрофда уёқ-буёққа айланиб турди. У ҳали ажойиб хушхабарнинг таъсирида эди. Ижодий ҳаётида бу — ҳозирча энг катта воқеа. Унинг ҳудди шу вақтга, Мұхсина билан ораларида гап қочган

кунларга тўғри келиши айни муддао бўлди. Энди жамъаси жойига тушади. Муҳсина унинг қувончини юз баробар ошириб юборади. Маратнинг бутун ҳаракати, уйқусиз түйлари ҳам, комиссия ишлаётган кунлардаги бесабр ҳаяжонлари ҳам — бари Муҳсинанинг бир қувонишини кўришга қаратилган эди. Мана энди ўша кун келди!

Муҳсина чизмакаш қизларнинг кўк батист комбенизонида шошмасдан чиқиб келди. У одатдагидек зебо, билагида эркакча оғир соат, нимдошроқ енгил коржома белларини сиқиб тураг, ўзига жуда ярашган эди, упа-элик кўрмаган юзи бир оз оқишдан келган, катта кўзларида сокин табассум.

— Габриклайман, Марат ака,— деди қўл бериб, босиқцина.— Энди ниятингизга етасиз...

— Йўқ, биласизм қачон ниятимга етаман? — деди Марат қизнинг қўлтиғидан олиб сайдир йўлкасига бошларкан. У Муҳсинанинг ўзи кутганчалик қувонмаганини сезарди, лекин буни ўтган сафарги кўнгилсиз гапларнинг таъсири деб ўйлади.

— Қачон?

— Биласиз-ку, бу — сизга боғлиқ, Муҳсина.

Қиз индамади. У очилмаяпти. Бундай қолдириб бўлмайди. Уни энг муҳим, энг қувончли, бошқа гапларни сиқиб чиқарадиган асосий масала билан банд қилиш керак.

— Мен катта қувончлар, орзуласар билан келган эдим, ёзилиб гаплашмаяпсиз, Муҳсина...

— Йўқ, нега, гапиринг.

— Албатта, баъзилар айб қилиши мумкин, «азадан кейиноқ...», «у — бу» деб... — секин, одатдаги ёқимтой овози билан сўзлай бошлади Марат.— Лекин биз у эски гаплардан устунроқ тура оламиз. Қувончимизга қувонч қўшилсин, Муҳсина. Бахт-толеимиз ўз қўлимизда. Анави... синов ойи ўтиши билан... бир кичкина, замонавий ўтириш қилиб... деган таклиф бор. Нима дейсиз?

Муҳсинанинг нафаси ичига тушиб кетди. У ердан кўзини олмай, туфлисининг учига қараб қадам босар, билагини ушлаган қўлидан йигитнинг ҳаяжонини сезиб, ўзининг иккилана бошлаганини пайқади. Пайқади-ю, гўё яна жим юраверса кейин кечикиб қоладигандай, юрак ютиб, айтадиганини айтди:

— Биласизми, Марат ака... Мен... мен аризани қайтиб олдим. Кечирасиз... бу билан дўстлигимизга путур етмас деб ўйлайман.

Марат ҳанг-манг бўлганидан тўхтаб қолди. Рўпарасида ерга қараганча қиз ҳам тўхтади. Ҳамма нарса аниқ эди: Ҳазил ҳам йўқ, англашилмовчилик ҳам. Йигит юраги-

нинг қайсиdir бир бурчагида шунга ўхшаш хунук гап эши-тиш хавфи яшаганини энди англаб, энди тан олди.

— Мұҳсина... нималар депсиз?! Ахир илгариги гапларнгиз... Ахир мен сизни яхши күраман, Мұҳсина! — у асабийлик билан қизнинг икки билагидан беихтиёр қаттиқ ушлади. Мұҳсина унинг юзига бир күз солиб, оқаринқираб көтганини күрди-ю, юмшамади:

— Яхши күриш... Марат ака, бу ҳам жуда эски гап-ку. Эскилил ахир. Қелажак эмас, ҳар қалай, сизнинг... келажагингиз эмас. Мен буни пайқадим.

Марат шафқатсиз кинояни ангади.

— Қелажак, келажак, деб киноя қиласиз... Бу айб эмас-ку, ахир. Дарапт ҳам офтобга интилади, одам эса — келажакка.

— Дараптларнинг илдизлари она заминда. Бўлмаса интилолмасди.

Марат дарров жавоб тополмади, ожизлигини сезиб, асабийлашди. Мұҳсина билан бўлган аввалги баҳсларини ҳам эслади-ю, ўзини тутолмай, ачитиб гапиргиси келди:

— Мен тақводорлигингизни юзингизга солгим йўқ эди. Тегадиган йигитингизга менга берган ўпичларингиз ҳақида гапириб беришни унутманг! — деб шартта тескари қаради.

Мұҳсина хафа бўлганини билдириласлик учун ҳазинроқ жилмайиб қўйди.

— Ана, гапингиз ҳам, товушингиз ҳам дарров бошқача бўлиб кетди.

— Ахир уч ҳафта ўтмай шунча ўзгардимми, ёмон бўлиб қолдимми?!

— Йўқ.

— Бўлмаса, ким ўзгарди?

Улар келган йўлларига қайтдилар. Энди қўлтиқлашиб эмас, қўл ушлашиб ҳам эмас, шунчаки ёнма-ён.

— Сиз... ўша-ўшасиз, Марат ака,— деб анчадан кейин ўйчан сўз бошлади Мұҳсина.— Билмадим, нима ўзгарди... Биласизми, мен кўп ўйладим, ҳаётимизнинг қандайдир ахлоқий сарчашмалари, ота-боболарнинг руҳий удумлари бор. Уларни оёқ ости қилган одам самимий бўлолмайди. Ўша куни сиз кўрган китобда бир жазо усули тасвирлана-ди. Ўша жазодан кейин одам хотирасини тамом йўқотиб, өл-юртни ҳам, ерини ҳам, насл-насабини, ҳатто онасини ҳам унтар, танимай қолар экан. Манқурт дер эканлар шундайларни... Манқурт бўлгим келмайди...

Марат моҳиятига унча тушуммаган бу гаплар унинг бошига гўё тўқмоқдай бўлиб тушганини сезди. Гангиди. Ҳар қандай гап хаёлига келган эди-ю, бунчалигини кутмаган эди. Бояги қувончлари ҳам қаёққадир буткул учиб кетди.

Мұҳсинанинг жүнаб қолганини у үзокдаги «түқ-түқ» пошна товушидан пайқади. Қызы катта ишни охирига етказғандай, ҳар замонда ишчанлик билан соатига қараб қўяр эди. Нозиккина, жондан азиз шу кичик вужудда бу қадар шафкатсизлик...

Марат, тепасидан нимадир зил босиб турғандай, жойдан жилолмасди.

Она қазо қилди.

Мұҳсина кетди.

Ижодий қувончлардан асар ҳам қолмади...

Кетма-кет бу зарбалар қаёқдан келяпти — Маратниң каражат ақли етмасди. Боши қизиб кетди. Хиёбон дим, ҳаво ғуборли, нафас оғир. Ёнғир ёғолмаяпти. Ҳозир бир қуиб берса эди...